

## lis Gnovis

## ■ UDIN. Messe par furlan

A Udin, la Messe par furlan e ven cjantade sabide ai 15 di Dicembar, a 18, li de capele de «Puritât», dapruv dal domo. E compagnarà la celebrazion liturgjiche la corâl «Lavariano» di Lavarian. Al cjantarà messe pre Davide Larice dal centri «Giovanni Micesio». Radio Spazio e trasmet sul moment, ogni setemane, dute la liturgjie.

## ■ MUÇANE. Il don di Cjamparòs



A son trê i Arbui di Nadâl che la Vicinie di Saifnitz/Cjamparòs ur à regalât a lis Comunitâts di Muçane. Il plui grant al è stât iluminât ai 8 di Dicembar, te place San Marc. Chei altris doi a indalegraran i fruts des scuelis e la int dai Cjasâ Franceschinis par dutis lis fiestis. I rapuarts di Muçane cul Consorzi agrari «Vicinia di Camporosso / Nachbarschaft Saifnitz» a jentrin fra chei inviâts dal Assessorât comunâl pai Ûs civics cu lis Comunitâts titulârs di Bens coletifs, te ativitat di promoziun des proprietâts coletivis dal país. La int di Muçane, di fat, a son parons di un grum di campagnis (dulà che si prodûs, in mût biologjic, la «Farine e il Pan di Muçane») e di ducj i boscs dal teritori comunâl. Tai agns passâts, in grazie de amicizie fra Dominis coletifs, a son rivâts te Basse i peçs di Pesariis, di Davaste, di Pontebe e di Culine.

## ■ MALOJA. Seradis cul cine furlan

Il documentari «I Custodi dell'acqua», dulà che Giulio Squarci al conte la storie des lotis cjargnelis pe difese de aghe «Ben comun» ([www.icustodidellacqua.it/](http://www.icustodidellacqua.it/)), al è stât sielzût dai organizadòrs di «Ecocinema» par screâ la edizion dal Invier 2018-2019 de rassegne cinematografiche svuizare, che e larà indevant insin ai 22 di Març, cun 6 proieziuns. A la prime serade furlane, programade ai 8 di Dicembar, cul confront fra il regist cjargnel Giulio Squarci e Fernando Giovanoli dal Comun di Bregaglia, al seguissarà un secont apontament dedicât a la Patrie. Ai 18 di Zenâr, li dal municipi di Castasegna, al sarà presentât a 20, il film di «The New Wild. Vita nelle Terre abbandonate» di Christopher Thomson, che al presente l'abandon e la rinaturalizazion des Prealps Juliis, tai contors di Mueç e sù pal Cjanâl de Aupe ([www.christopherthomson.net/the-new-wild-it](http://www.christopherthomson.net/the-new-wild-it)).

## ■ PLODN/SAPADE. Todescs de Patrie

In grazie di un finanziament di 52 mil euros, al nassarà il «Sportello linguistico regionale per la lingua tedesca». Al è stât stabilit de Zonte regionâl, che e intint di permeti di doprà ançe il todesc tai rapuarts cu lis struturis de amministrazion publiche. Il finanziament al coventarà ançe par prudelâ la ativitat de gnove Assemblee de Comunitât linguistiche todescje, dulà che a saran rapresentâts i Comuns di Malborghet-Valbrune/Malborgeth-Wolfsbach, di Paluce pe Frazion di Tamau/Tischlbong, di Pontebe/Pontafel, di Sapade/PloDN, di Sauris/Zahre e di Tarvis.

<b>Joibe 13</b>	S. Luzie Vergjine	<b>Lunis 17</b>	S. Modest
<b>Vinars 14</b>	S. Zuan de Cròs	<b>Martars 18</b>	S. Grazian
<b>Sabide 15</b>	S. Virgjinie	<b>Miercus 19</b>	S. Anastasi
<b>Domenie 16</b>	S. Delaide	<b>Il timp</b>	Cualchi floc di nêf



**Il soreli**  
Ai 19 al iève aes 7.45  
e al va a mont aes 16.23.

**Il proverbi**  
Cui che al à plui judizi,  
plui indî dopri.



**La lune**  
Ai 22 Lune gnove.

**Lis voris dal mès**  
Tune part dal vuestri orto si puein semenâ  
sparcs, ravanei, favis, cevolis.

## Costituzion pal Marimont

La prime «Agorà dai popui de Tiere», a Sezano di Verone

Il timp di vuê al è «il timp che si scuen olsâ, te lote e te propueste, e il spazi di vuê al è chel dal mudament: il spazi de Umanitât e de vite globâl de Tiere, in ognidune des sôs declinazions, teritoriâls e sociâls»: al vûl un cûr grant par frontâ lis disfidis dal di vuê e il proget de «Agorà dai popui de Tiere» al è pardabon ambizionôs. Dai 13 ai 16 di Dicembar, int di dut il mont si darà dongje li dal «Monastero del Bene Comune» di Sezano (<http://monasterodelbenecomune.blogspot.com>), su lis cuelinis veronesis, pal congrès mondial, progetât de Fondazione «L'audacia nel nome dell'umanità», che e cjape dentri inteletuâi e operadòrs sociâi di dut il mont: africans, asiatics, americans, europeans. Fra i talians, a son Guido Barbera, Paolo Cacciari, Curzio Maltese e Riccardo Petrella, che al fâs di puarte vòs pal Comitât dai promotòrs e che al à leât il so non cu lis iniziativis dal Comitât internazionâl pal «Contrat mondial de aghe».

Dal Chili, al rivarà il vescul furlan Luis Infanti de la Mora, innomenât pes sôs lotis cuintri dal sfrutament idroelettric des aghis de Patagonie. Altris protagoniscj dal dibatiment a saran l'atôr ebreu Moni Ovadia, il teolic de liberazion Marcelo Barros, il filosof Roberto Mancini, la coordinadore dal «Global Justice Network», Francine Mestrum, la mediatore camerunese Marguerite Lotin, il miedi indian Siddhartha Mukherjee e Isoke Aikpitanyi, nigjeriane che si è liberade dal «racket» de prostituzion e che, vie pal 2018, e à ricevût il premi «Donna dell'anno». In dut, si spiete al mancul un dusinte di lôr che a lavoraran dapruv de «Cjarte de Umanitât», une costi-



Il «Monastero del Bene Comune» di Sezano e Riccardo Petrella, animadòr de «Agorà» (Foto Lo Scalzo)



**Inteletuâi e operadòrs sociâi di dut il mont congregâts, dai 13 ai 16 di Dicembar, par scrivi la «Cjarte de Umanitât»**

tuzion mondial cul proposit di garanti la fonde juridiche pal concet di «Umanitât» e di afirmâ un gnûf sogjet di dirit: il «Citadin de Tiere». Par otigni chest risultât – al bat Riccardo Petrella, che al à insegnât ce tant timp li de Universitât catoliche di Leuven/Louvain, proponint cors di «Politiche scientifiche e tecnologjiche» e di «Mondializazion de economie» – al covente fiât avonde par frontâ trê grandis cuistions: sbandi par simpri la vuere; ricognossi la ilegalitât dai fatòrs struturâi che a causonin la puaretât tal mont e la escluson dai puars; disvinidri, zonte fûr, il sisteme finanziari speculatif e predatori.

Par meti in vore la «Cjarte de Umanitât», seont i promotòrs de «Agorà dai popui de Tiere» al covente un «Consei di sigurece sui Bens comuns publics», tirât sù dal bas, e si à di començâ a ufrî ai citadins di ducj i Comuns dal mont une cjarte di identitât gnove cul titul di «Citadin de Tiere», marcant i aspjets simbolic, uman e sociâl e superant il valôr legâl tradizional. I documents prontâts par guidâ la riflession e il confront si pue cjetâju tal «blog»: <http://audacia-umanita.blogspot.com/2018/09/13-16-dicembre-2018-sezano-verona.html>.

**Mario Zili**

La lote dai Catalans dal «llaç groc» contade a Udin de gjornaliste Maria Xinxò

In «Catalogne a 'nd è ancjemò presonîrs politics e doi di lôr a àn començât il siopar de fan. La int e domande libertât par chestis personis, mostrand un floc zâl. In grazie di Suns Europe, o vin rivât adore di tornâ a stiçâ la atenzion su la region»: cussì e à fevelât Maria Xinxò, giornaliste catalane, invidade a Udin

pal festival anuâl des arts performativis da lis regions cence stât. «In Spagne, si cîr di platâ il colôr zâl – e à motivât la condutore de trasmission «Islàndia», programade di radio «RAC1» –, parcè che al è calculât il simbul des aspirazions di indipendence, là che invece al è une denuncie de repression politiche».

## Peraulis in dismentie par cure di Mario Martinis

## ❖ BERDEI

s.m. = imbarazzo, garbuglio  
(variante di imberdei "imbarazzo, involuppo, garbuglio")  
Ce berdei! Cîrî di tirâsi in bande.  
Che garbuglio! Cerchiamo di tirarci da parte

## ❖ BIÂT

s.m. e agg. = beato; povero, sfortunato (tra il tono commiserativo e vezzeggiativo)  
(dal semidotto beatus)  
Ah biât to pari!  
Ah beato tuo padre!

## ❖ BINE

s.f. = piccia di quattro panî che formano assieme un'unica pagnocca (forma di pane)  
(dal latino bini "a due a due")  
Le mè gneçute mi à puartât une bine di pan par domenie.  
La mia nipotina mi ha portato una piccia di pane per domenica.

## ❖ BIELZÀ

avv. = già, oramai  
(composto da biel e zà "ormai")  
Bielzà misdi?  
È già mezzogiorno?

## ❖ BILITE

s.f. = donnola  
(da bellus con il suffisso diminutivo -ite)  
La bilite di Nart e je la plui furbe.  
La donnola di Leonardo è la piû furba.

## ❖ BINTAR

s.m. = sprecone, dissipatore; vagabondo  
(dal tedesco Winter-(arbeiter) "operaio invernale", alludendo all'operaio che rimane in inverno nel paese straniero perché non è riuscito a mettere da parte i soldi per il viaggio di ritorno)  
Valerie e à un bintar in cjase.  
Valeria ha uno sprecone in casa.